

四庫全書

子部

欽定四庫全書

寶真齋法書贊卷十九

宋 岳珂 撰

宋名人真蹟

米元章書簡帖上

兩卷共二十九帖並行書第一
第二第九第十一第十二第二

十五帖各九行第三帖四行第四帖二十一行第
五第八第十四第二十三第二十七第二十八帖
各十行第六第七第十三第十六第十七第十八
帖各十三行第十帖七行第十五第二十四帖各
三行第十九帖十七行第二十第二十二帖各十
二行第二十一帖十六行第二十六第二十九帖

各十
一行

帝頓首再啓今歲當從聖奏計故事代之者即奏也使
節到都八月半例以九月發行司西上十月到國門我
公可到南都左右復西也餘並人吏西占帝頓首再拜
帝頓首再拜蒙教二十一日望屈大旆雪圖上納橫軸
非不愛未見公所愛者耳帝留數日奉納也向晚料峭
起居萬福謹奉狀不宣帝頓首再拜大夫文節下

太夫人玉裕萬福不及拜別快快老妻伸奉洎趙妹郡

君各希加愛加愛芾再拜

芾頓首再拜右丞資政春官恩主釣席仲春漸涼恭惟
台候動止萬福即日芾蒙恩昨以四月忝命改官盡緣
知獎沒齒曷報六月被遣此邑聞台旆將至遲遲留七
月以俟一識威采面感恩紀謁令弟始知不可俟抱悵
之官近亦得令弟書始知對簾遂力疾作書以布下情
其餘候趨省詣府造門叩閣所懷非紙所罄不宣門生
米芾頓首再拜右丞資政春官恩主台席 謹空

芾頓首啟蒙教霜起居冲勝已支千條付已脚錢既奉
委惟所諭更不須申稟鮮禾方成更與放限十日佳般
木亦須限外毋奪農時佳苦暑末可約過弊邑良食利
人自愛草草芾頓首滿川宣德明慈閣下

芾頓首再拜久達長者幸茲邂逅不謂行役莫獲少延
節旄以寫傾慕昨日繼至舟次不可俟留刺快快而歸
適蒙雅誨且承食已首塗方寒千萬珍養訓仲相聚道
意謹附使陳情手凍草草芾惶恐上運副朝散老兄節

下

帝惶恐頓首專介踵門蒙手教荷溫眷有加自承鹽邑
還日夕排比宿司以俟臨按者不聞好音鄙棄下邑乃
如此耶忽大熱恭惟比日尊體清勝帝抱冰中夕公和
懼曠莽有何所聞且以見教去替數月矣過熱遂可買
舟治行矣謹附使上謝不宣帝頓首再拜管勾推官文
閣下

帝頓首十日之歡足慰故人遂別心目悽斷有興除酒

安樂大是塵生好事惟為親珍攝今晚之意不快歸念
之不已區區別啓楚州運勾石仲謀清修可愛試一見
之芾頓首方回老弟人英 穎公相見道意今日不得
同一笑恨恨珍重

芾頓首再啓比苗幕過道從輿衛于琅琊之間為泉石
之樂恨不接遊跼也滁天下佳山水且少過客諒稱高
懷正恐賜環在邇不能久彼留也芾頓首再拜

芾惶恐頓首再拜啓大雨恭惟台候萬福名筆為亂道

遂塵污矣七月一日大年約來蒲池閱邵伯瓜洲須十日一相見乃佳芾頓首成伯公門中各惟清勝郎娘長茂芾再拜

芾頓首向承貽教無便久不得為答以致久仰之素想高明諒之春和道味何如一水之阻未遂展接千萬珍厚有便數枉書為望草草芾頓首僧正文公

芾啓蒙教昨夕經義真蘇門生也待都伴不會却是惜岐首也今送去四十賢購于泗州一過賓陳主簿名師

仲乃芸叟生甚艱揚有善傳寫者開節奉為吾顛出一
千作手功畫八本奉寄取幞頭人來取也藥又夜來告
夢云去一顛得一賢亦何所在不知何祥也紙足為大
案此帖文義多不
可解疑有脫誤

節即日蒙恩未即瞻望伏乞對時精調興寢下情虔祝
謹因便介附狀起居不備門更米芾頓首再拜運使大
夫文節下

六月二十日芾惶恐頓首上啓離潤得干珍旋聞入列

卿寺雖少雄飛未弄翰墨未副手相策足足不一賀也
到官衰疾相仍拜啟後時披晤未卜伏惟珍毓不備芾
頓首再拜座和大監台座 濡須僻陋月十日無一述
無一過客坐井底爾有幹示下芾惶恐

芾頓首再拜經宿恭惟台候萬福伏想般舟良勞神用
俟到蕭閒參見次前蒙寵賜嚴命不許辭然今有所獻
公亦何辭以拒之通園願隨葺錦增光久為選人鈍滯
非稱也若不以為不恭願檢入謹奉啓不宣芾頓首再

拜知府鈐轄待制台座 硯在合內

帝頓首再拜君發太尉台座之杞拜達旋得官江湖歸
拂冢山杜門不出人事殆絕比到都見陳子真承動靜
復知已更王夫人之痛不覺嗟悼不能已復自咎不敏
阻貢尺書以勞孝思內有慙負疚不能已比日台體起
居何如謹奉啓通誠拳拳下情此不能宣帝頓首再拜
君發太尉台座 小兒益長人物不凡伯時姻事有期
未

芾頓首再拜彥和通判承議閣下端禮處拜達迄今不
承音驛客至恭審到官冬序向凜伏惟神明扶持尊體
起居萬福芾衰晚如昨未卜展晤伏惟珍厚謹奉啓不
宣芾頓首再拜彥和通判承議吾友閣下十一月十九

日狀

芾頓首再拜觀使樞密太尉先生鈞席伏審榮拜宸俞
遂請歸第天柱之任暫留時棟睿眷之重定將起矣惟
初解浙西之節制聿居綠野之燕安神明掖扶氣體泰

定有足樂也芾以出入不得阻隨杖屨看山揮麈磨企
不極不備老弟子米芾頓首再拜觀使樞密太尉先生
鈞席

芾頓首再拜至孝景溫觀察台座區區已曾奉疏流落
三年重來京國恍如夢覺治居未定未及上謁專介及
門喜孝履多福三兩日詣慰既親又與令姪同官不妨
否更俟一言燭下方客起不宣芾惶恐上景溫觀察親
友台座

帝頓首再拜聞公有官職壓人之說是何言歟公世德清茂才高望重越自小官慨然論天下事宜比馬周此未足賀老友固不奉佞也望日文德門多見諸公獨不見公何也癰方須得大段酬勞方傳恐前書真不達耳帝頓首再拜知有令郎之戚此難違者能書第二兒二十歲化去刻吾心肝至今皓白之由也癸未去國至今二兒二女老年何堪何堪再到

案此下有脫誤

卒三姊夫交游

喪盡情懷落魄不振不振

黻頓首再拜相從之樂自卯及己十五年矣自武林失
恃遂髮白齒落頹然一老翁若與公相遇他處宜不相
識耳比來慶侍下起居何如偶洽光同官劉穆之行奉
書千里相望何日會合臨風悵然黻頓首通判朝奉君
謨兄

老兄幾子吾鼃兒十六矣又二子粗長黠後房進幾人
郭德又見報知蜀中一邑都未得消息郭愁猶通直洛
陽命頑健如昨湖外有何勝事嶽麓雲水為我致意黻

頓首

賀知章草書唐人歌詩往往及之今有人收得否試託
問之黻

向承惠洪氏石刻多感往歲謝公處得之想其真蹟精
妙何當一見之家藏墨蹟數本今以石刻奉寄一笑輒
欲以告身質過數日奉還如何黻頓首

芾頓首啟適奉賀留刺晚來起居萬福舟兵自到日支
錢餓得欲死今日旬下支一料米去告指揮日支與米

為幸主簿甚嚴傳語皆不答聞有甚條貫吁可畏哉謹
奉啟咨叩勿泄此語恐相惱不一一切希頓首再拜
道濟通判中大夫

希頓首啟知曾賜教使下失去感愧異常知西第已為
人貨已遣人去輟蓋一相知也若人口少別輟得一位
與之甚幸甚幸諸處尋屋不得園中屋得數間希亦可
居也且望留意不敢忘德草草希頓首太保吾親

希頓首再啟蒙眷有素不敢自外具有丹赤仰干左右

帝今任不礙舉辟管勾文字或帳司得備驅策敢不自
竭帝六月正滿三十箇月百指畏暑西上而貧無桂玉
之費儻蒙恩私仰戴山嶽帝惶恐頓首

知庵成自逸仰慕不已雨多種植必皆青活弊庵前栢
活否更求數株益之黃鶴冢山前水池水不乏否告問
主者若不乏不須問也竇晉必蒙照管恐損漏開春求
宣明東歸老拙曳不行也天啓曾有書去達否帝頓首

米元章書簡帖下

三卷共三十五帖並行書第一竿
二十五第二十四第二十

帖

各七行第二第八第十六第二十五第二十八帖
各十一行第三第十二第十七第二十三第二十
五帖各九行第四第十九帖各八行第五六行第
九第三十二第三十三第三十四帖各六行第六
第十四第三十一帖各十三行第七第十三第二
十帖各十二行第十一第二十一第二十二第二
十七帖各三行第十八帖十八
行第二十六第三十帖各五行

芾啟早略一揖未慰久別承來語久候無耗故因僊歸
息傾仰傾仰來早願同令兄見臨一飯訖同至山房然
後歸治行未晚也切切餘面罄草草芾頓首致平國士
芾頓首再拜右史舍人老兄閣下蒙手翰貺尚方珍醴

拜嘉增幸來日當引九日拜臨顧之辱併叙謝意謹奉
啟不能罄所言芾頓首再拜希聖舍人親家台座 來
日東華得一介相引乎吏部至今不見人來耳

芾頓首再啟行日伏蒙尊造枉駕水次不遑迎謁內積
悚恐不審尊兄竄政何日到闕欲拜狀也芾疎謬正託
德門每賜訓督使逃罪戾至幸至幸芾頓首再拜

黻啟前人迴郡官訪及方下船著公服又欲即行故草
草數字必不怪也輒假小舟至敦送彥誠觀師還寺舟

至即西至幸如期少頃至也餘到潤留書復古次百冗
草草芾頓首不二禪師故人

黻頓首雨寒安勝不知在施水資聖奉尋不見快快張

公必拜見晚歸可少

案此下永樂大典原本缺

黻頓首

彥誠觀師

同此

芾頓首再拜運副奉議明公節下去陳聞使節至許至
建雄鎮專介上狀久之迴至云汝還臺阻一披晤此情
悵然故再奉啓并前狀上納霜寒深冷恭惟尊體動止

萬福區區已具右狀中者不重述不宣
芾頓首再拜運
副奉議明公節下十一日狀

芾惶恐再拜私居杜門以禪悅為樂
彥舟去後不聞左右動靜嚮風永懷
不能已已臘寒比日官況何如門中
上下均慶去歲之念必少彌忘聞其
素屬疾非小兒五日間忽然不見幼
法有如是不以禪悅何以為遣者臘
寒千萬珍重二月或所請宮觀不報
即扣閣惟珍葆珍
葆芾頓首再拜厚之知府學士德友

芾頓首再拜昨日煩貼出京始一飽也經宿起居沖勝
白熟求四枚差小者卓上碧水晶與老驥壓紙可否以
吳顧道約來相見故未行早飯了東邁依依奈何奈何
芾惶恐上厚之宮使學士思舊 范寬四幅贈老友如
何

二十五日芾上啟得十四日書知已到官雖國士失進
躡之序聊為知己屈甚善甚善專啟叙懷芾頓首再拜
彥舟學士樞僚仁友

黻啟昨日承教直夜不及答午間得暇訪及面叙俸錢
支使之數屬出外邑五七日比畫能一遊寺乎草草蒞
頓首上公震太尉台座

蒞惶恐蒙教審台候萬福牌寫了久將謂已取去來日
遣人來并今日者來取兒子入寺檢未得也區區別啟
蒞惶恐上公震太尉台座

三月十一日蒞頓首啓衰老蒙誤恩寵徑西不得少留
以承二君子動止伏惟珍愛珍愛蒞頓首再拜安中學

士吏部二友麾下

芾頓首再拜運使大夫丈節下昨以手拙附專介以代
占謝恭想已達左右即日春和恭惟神明相佑尊候動
止萬福

芾再啓高郵不須亂置生事黉居非吾鄉我里無人勾
副定國是也牽復既去只養別人四時纂要四月一雨
又主旱請借一閱道路人言高郵依舊水涵雨雪不少
不知果否昨過彼時水涵見邵伯以次數道通湖港皆

以土填塞斷從初救田今合放開耳想不一處豪姓因
而擅之恐非公家利也芾頓首再拜

芾惶恐前辱臨顧兩日打糧借人未得翌日馳造尊勝
至今不見石工特來許借告給付區區面罄不宣芾頓
首太易吾友

芾啟適方上狀使至尊教欣審晚刻尊候萬福并蒙佳
茗為覓併深感悚來日朝晚幸臨屈一飯也區區容面
叙且奉此為謝不宣芾再拜志行通判承議老兄

芾頓首再拜初熱恭惟神明相佑尊體萬福賓老以英才受審知布上寃書暫至澤國而芾以官期當去不得少棲清范以此為恨耳芾頓首再拜

十一月二十一日芾頓首上記留守大資政丈鈞座私居乏人數探伺竟阻追攀大旆此情惘惘念蒙令弟拂拭而久與明甫遊也故自竭有以獻惟公宏恕其愚而矜其志之善也願公開懷以待天下之士猶恐人人不自信勿以泥塗之久懷廷尉榜門之心深閉固拒以絕

天下之士願以常情處人而躬行高世之事忘恩怨會
通一致出人意外晏然為明主安一世之人起治功致
太平此為下識之所瞻望中夜而興披衣呵筆草畧死
罪死罪門吏米芾頓首再拜

右簡尺先臣芾真蹟臣米友仁鑒定恭跋

行書
二行

芾頓首再啓故人作發運使都不照管下邑今十連作
帥當似臨淮縣長官時故事但一片心脾依舊佳在不
知委悉得過否芾惶恐再拜

倅同官來江寧少小相識父處刁幕熟鄉人一戎同官
來須少過從亦是未得報間同出入遊山之人三處是
飯主人貴人出入難不敢牽率知客位傍甚嚴此為常
人設耳豈米老有不得船之理呵呵俟面千也帶惶恐

再拜

案此帖首行
應有脫誤

糖霜大治喉咽甘幸尤能發散含花佳蒂頓首

真麝香一劑置痛處薰透氣立安蒂諮

老妻上問夫人玉體萬福楊老夫人乍到未得去拜屈

同官于此得款還往也才回謁楊簽歸便行知有人在
彼故立草草作數字不得周悉書表司與假遂令小官
作書不罪不罪芾再拜

芾頓首啟昨日特承寵臨屬王氏兄弟飯遂阻于門迎
留以朝衙謹先上納旦夕祇造不宣芾頓首再拜景仁
通判宣德兄

芾頓首再拜在無為一書作廣州題達未衰老忽西去
出意外憂畏而已因賞心亭與元龍屬酒選三麗人歌

自作詞云有人去廣德立作此書用致唐仰草草不罪
不罪帝惶恐司諫台座 門中各安勝安勝

右楮紙詩書等十幅先臣帝晚年真蹟臣米友仁鑒定

恭跋

詩摘在詩
文帖中

帝頓首再拜丹陽人安舊治偃藩上游琴尊足以自適
時來則為蒼生起耳帝頓首再拜

海岱絕唱已刻于柱與劉顛者對也非二顛者不刻帝

頓首七月六日

帝頓首再拜運使大卿台座春序向和恭惟澄清之暇
神明相佑德履起居萬福帝被遣俟命于左右已次于
潤舟大水漲過橋不得未即參侍伏乞為上珍厚專介
上啓不備帝頓首再拜運使大卿台座

黻補填尚少八日以新府公至理須出見來日且參假
登舟至真滁日移疾報本州不審尊意如何黻蒙恩有
素不勝傾倒之至黻頓首再拜

帝惶恐來早為一題江樓少延道韻只今秋衣在此烹

恭久俟帝惶恐府公少監大夫公

帝惶恐再拜彥稽提舉太史公甲兄節下抱疾之官十日九假事皆委薛侯改雙槐堂為寧一堂射堂雨敗堵悉見北山萬疊名曰仰止堂于甲兄可謂無負矣帝衰老之人每臨一事欲仰兄精力不已力疾答專使不宣帝惶恐頓首彥稽太史公提舉節下四月旦日狀帝啓衰晚辱誤恩法不可辭祇益悚懼蒙教賀重其慙悚附使具此草草帝頓首亦虛吾友

不煩如此前言甚易當必不到入臺章也呵呵

餓殺客也芾頓首安中吾友

昨夕作此簡未及遣承寵誨荷垂眷今早食後作

案作字上

下有晚阻城外約來早告顧舟中北城外一飯幸甚幸

甚芾頓首

芾頓首再拜先白吾友疎展晤思企暑中起居何如小兒未聞師誨願以童蒙之道處之謹遣侍筆研于左右惟久要終始造成之悚悚異日報德不宣芾頓首再拜

先白吾友 同舍萬福

右崇寧南宮舍人寶晉米公芾字元章書簡帖真蹟
六十四幅分五卷中興初思陵以萬幾之暇垂意筆
法始好黃庭堅書故戒石之銘以頌而方國一劉遂
皆似之後復好公書以其子敷文閣直學士友仁侍
清燕而宸翰之體遂大變追晉輔唐前無合作珂家
所藏詔墨幾百軸以歲月攷之良是故紹興間公書
盡歸九禁而世罕傳最後赤水得珠頤神北內躬御

寶跗製翰墨志多紀公遺事益知帝心簡注惟公是
嗜是帖多天上本間有內府圖書及紹興寶璽在焉
前五帖嘉泰壬戌歲正月得之中都范氏次十帖開
禧丁卯歲五月得之李奉寧客何師說又次四十帖
嘉定戊辰歲二月得之京師官鬻又次九帖己巳歲
八月得之豫章朱氏顛末印識全及半者通五十所
贊曰論書自晉始蓋因其風俗之清而流之于妍降
而六代又以其習尚之篤而溺之于專維唐設科身

判書言作成自初歐褚爭先薛靚張顥顏真迎便中
世而後雖經生楷隸猶得以揚鑣而鳴鞭五季日卑
我宋興焉士以德進捨藝之偏既窒其進取之塗故
世之以書名家者皆不雜以人而純乎天更八葉之
豫豐乃設學而詳延有節者出集其大全蓋繇義獻
而來邈崇觀而前或營萃以拔棘或宮墻而及肩或
小醇而大疵或舍正而取權六書之統殆所謂節之
死不得其傳也嶽嶽喬嶽洋洋大川草木風雲波濤

蛟龜我繫此評其然豈然較三十里後八百年

米元章靈峯行記帖

大字楷書
十二行

邵毓胡端修吳亮米芾同遊靈峯寶刹崇寧甲申五月

望日書

易安居士一日攜前人墨跡臨顧中有先子留題拜觀
不勝感泣先子尋常為字但乘興而為之今之數句可
比萬金千兩耳呵呵教文閣直學士右朝議大夫提舉

佑神觀友仁謹跋

行書
十行

右寶晉米公靈峯行記真蹟一卷天下未嘗無勝游
惟人與境稱而後傳久其次以文其次以字畫攷乎
此亦可觀矣寶慶丙戌秋得之京口故藏易安室有
元暉跋語繫焉

贊曰永和之蘭亭列序時人文字之不磨千載莫鄰
彼睇顏之徒雖未足倫觀其所傳亦庶幾彷彿乎清
塵

米元章獲硯帖

草書十
一行

僕今日獲天下大奇硯世未有也他日使公歛賞不已
石佳發墨眼大如錢大小適中渾厚古雅平生收端硯
未有此比異日方知不誣也公家鳳池空大不適用爾
今歲有此奇獲真丙辛天地合也問九哥可知

右十行皆吾家舊所收悉為邦人得之多以歸好事翟
佑之蓋晚年字也子友仁審定真蹟

右寶晉米公獲硯帖真蹟一卷予作硯山園先一歲
得硯山詩表英光堂將以殿帖謂足以大全矣錫山

鄭子恭時中一旦來訪謂家有獲硯帖必與硯山事
實相表裏欲持以見歸予喜亟問亟求不愆于約居
一月而帖至攷之非硯山也蓋他一硯耳而其言鄭
重如是予嘗讀山林集有一帖曰辱教須寶硯去心
者為失心之人去首者乃項羽也硯為吾首誰人教
唆事須根究然而復有一說徐熙梨花人多識之請
攜去遍示識者若可當硯猶為少存交情長年報答
必欲吾首亦不免永鎮烏江兩手擲下分付且只成

甚頭腦便希昆仲命駕早膳面議之噫噫硯尤物耳
固真足寶耶足寶矣固可以比首耶觀此寶晉之于
硯亦可謂溺矣不特硯又連以山而肯易一居其江
山在胸次足奪尤物之累如此亦可見不凡今乃見
園于予而又得是帖以表澄之特書屢書又可以見
帖而列之耶帖之言曰丙辛天地合而得是硯按寶
晉生以辛卯術家以天地合言則丙戌歲在大觀之
元如寶晉因得右軍王略帖作太師行固嘗以丙辛

合論得帖之月日矣帖與硯均在所重理固然耳而
葉石林燕語曰米芾誦誦好奇在真州嘗謁蔡太保
攸于舟中攸出所藏石軍王略帖示之芾驚歎求以
他畫換易攸意以為難芾曰公若不見從某不復生
即投此江死矣因大呼據船舷欲墜攸遽與之是硯
也首也帖也身也一而已予據此江山得無愧耶硯
山易居在何年不復可致而是獲硯帖公之子友仁
指為暮年字攻其歲月蓋仙去前一歲也豈硯山已

去而他硯無可屬意者又將因是以寄懷耶得帖之
歲蓋紹定戊子月乙卯日甲子云

贊曰公謂是硯生平之所無彼美硯山乃易其所居
既舍其所寶聊假以自娛其亦人之情歟

朱元章四大字帖

編本

智慧清淨

右寶晉米公四大字真蹟一軸寶晉書偉矣而盈尺
之字世亦罕傳寶慶乙酉歲十月得此于王文忠之

孫廩上有先朝內府印已糜損不可復識蓋故家所藏之傑出者

贊曰昔大令書壁作方丈大字觀者至數百人蓋能書家嘗以收斂觀楷則而以縱放觀精神予觀此書大不失倫蓋自智而慧者筆下有天之真悟而惟清與淨者胸中無一點之塵也

米元章曹子建應詔詩帖

行書六十六行尾記四行翼衛作翼翼稅此作

稅北如醒作如醒當是筆誤

肅承明詔應會皇都星陳夙駕秣馬脂車命彼掌徒肅
我征旅朝發鸞臺夕宿蘭渚芒芒原隰祁祁士女經彼
公田樂我稷黍爰有樛木重陰匪息雖有糗糧飢不遑
食望城不過面邑不游僕夫警策平路是由玄駟藹藹
揚鑣漂沫流風翼翼輕雲承蓋涉澗之濱綠山之隈遵
彼河滸黃坂是階西濟開谷或降或升駢駟倦路載寢
載興將朝聖皇匪敢宴寧弭節長驚指日邁征前驅舉
燧後乘抗旌輪不輟運鑾無廢聲爰暨帝室稅北西墉

嘉詔未賜朝覲莫從仰瞻城闕俯惟闕庭長懷永慕憂心如醒 曹植應詔

帝醉書于寶晉齋

右寶晉米公曹子建應詔詩帖真蹟一卷帖凡二百有一字字清勁如太液黃鵠商山紫芝騫雲吐虹各有出世間意醉中之天真蓋于是有神矣此先君祕笈第一物也得于淳熙之戊戌後五十年乃克贊之

贊曰吁嗟乎丕摧幹弱支予讀此詩何異乎煮豆而
燃其弔古以詩觀帖以奇瑤鈿銀泥以侈厥題

米元章蠶賦帖

行書六
十七行

里有織婦著簪葛帔顏色憔悴喟然而讓于蠶曰予工
女也惟化治絲枲是司惟服勤組紃是力世受蠶事以
蕃天財爾之未生我則浴而種以俟化爾之既育我則
飭其器以祇事爾食有節我則采柔桑以薦焉爾處不
恩我則俾溫室以養焉爾惟有神我則蠲其祀而未嘗

漬也爾惟欲繭我則趣其具而不敢慢也爾欲顯素絲之潔我則具繰盆繹器以奉之爾欲布幅利之德我則操鳴機密杼以成之春夏之勤則髮蓬不及膏秋冬之織則手胝無所代予之于予可謂殫其力矣今天下文繡被墻宇予卒歲無褐緹帛飾犬馬予終身卹緯寧我未究其術將爾忘力于我耶蠶應之曰嘻予雖微生亦稟元氣上符龍精下同馬類昔在上世寢皮食肉未知為冠冕衣裳之等也未知禦雪霜風雨之具也當斯之

時余得與蠕動之儔相忘于生生之域蠢然無見黎之
樂熙然無就烹之苦自大道既隱聖人成能先蠶氏利
我之生蕃我以術因緣以代堯因帛以易韋幼者不寒
者者不病自是民患弭而余生殘矣然自五代以降雖
天子之后不敢加尊于我每歲命元日親率嬪御祀于
北郊築宮臨川獻薦成服非天城宗廟黼黻無所備非
禮樂車服旂裳無所設非馭祀無制幣非聘賢無束帛
至織至悉衣裳萬物女子無貴賤皆盡心于蠶是以四

海之大億民之衆無游手而有餘帛矣秦漢而下本搖
未蕩樹耆媒以廣君欲開利塗以窮民力雲錦霧縠之
巧歲變霜綃冰紈之名日出親桑之禮頽于上災身之
服流于下倡人嬖妾被后飾者以千計桀民大賈僭君
服者蓋百數一室御績而千屋垂繒十人漂絮而萬失
挾纊雖使蠶被于野繭盈于車朝收暮成猶不能給況
役少以奉衆破實而為華哉方且規規然重商人衣絲
之條罷齋官貢服之職衣戈綈以示儉襲大練以去華

是猶捧由堙尾閭之深履杯救崑崗之烈波驚風動誰
能禦之由斯而言則予之功非欲厚古而薄今時之異
也予之纖非欲畜身以侈物化使然也二者交墜于道
奚獨怨我哉且古姜嫄太姒皆執子之勤今欲以一已
之勞而讓我過矣于是纖婦不能詰而終身寒云

石寶晉米公蠶賦帖真蹟一卷有內府及楚冑印各
一寶慶乙酉得之中都驚書吳氏筆力差似少年時
贊曰桑柘之利被天下而不足以庇一女鬢蓬手宮

而身不縷雲緘露組便疏曲戶世之類此者又何可勝數是將誰尤曰本是務彼棄我取維終以無害

米元章黃龍讚帖

行書十
八行

米芾黃龍真讚

高宗皇帝御書

的曹溪一點開從茲驢足踏塵埃黃龍若不三玄接
爭得東林八轉來

黃龍真讚米元章壬申歲同君發伯充國休過訪因戲

書

右寶晉米公黃龍讀大字帖真蹟一卷高宗皇帝親
題其標有楚胄印四小墨一筆勢精健意象淳古蓋
老作云嘉定癸未七月得之維揚

贊曰華胄遙遙楚國宗風的的曹溪喚起爭名米老
奎光長照珍題

米元章獄空行帖

行書五
十二行

獄空行寄獻府公朝奉麾下漣水令米芾惶恐

楚州五邑口百萬擾靜盡繫太守公政由吏人民乃擾

政由太守民氣通安土樂生善民欲惡民惟欲與吏同
太守無能不戢吏精力不給吏乃庸兩獄百間塞有罪
有耳未聞一日空晉昌唐公名世後清風素節為時宗
五更三點運精思衆人安寢吏計窮百姓小妄赦不罪
庶幾小屈能自致五色來者初亦彙久而官悚吏皆畏
雖欲呼之亦不至乃知獄空空有理百萬無冤無枉吏
來者迎刃無留滯赦來兩獄久無事太守政聲既如是
廉車旁午目所備胡不刻章上天子追風早來促公起

去入省闈或使指吏皆欲去民欲留我祝公去豈同吏
長坂大車程萬里

右寶晉米公獄空行帖真蹟一卷字故寫碧牋上天
書濃墨蓋當時投之郡將唐君者江之廬山宮日太
平有黃冠以好事稱多蓄法書予託劉君道謙贖得
此篇時嘉定癸酉八月也

贊曰事上官當以信溢美而言是謂私徇唐君果何
人而得此于寶晉予蓋于是三歎則前朝之得士而

未暇及筆法之神雋也

米元章四大字詩帖

案此帖行數標法原本缺佚

鷗鷺寒依水蒹葭靜靡風朝烟開雨細輕素淡山重

過當塗

一圍松竹冷陰森猶得桓公數可臨却巨

案英光集作巨劉琨

看左傳玉壺徒缺誤雄心 青山

賞心亭上羣山雪三夕丹淵借月華吟盡江南清絕趣

巫行歸覲紫皇家 鑑遠樓

昔夢浮生定是非
家山且喜隔年歸
扁舟又出欄湖闌
出處初心老更遠
拜書學博士作

右寶晉米公四大字詩帖真蹟兩軸公筆力雄偉而
大字尤奇此詩比智慧清淨字本不侔而氣象軒豁
卷舒之已具全體所謂精神楷則蓋兼之矣第二詩
雜用桓元子劉越石王處仲事語意殆不聯屬似記
憶之誤必有能辨之者詩得之京口紹定戊子三月
戊子

贊曰四詩之作句新而詞伉兩軸之書意軒而神王
合此名蹟奇變萬狀予得此詩季春既望風激海而
濺霧月穿雲而崩浪開函卷舒于小萬有之上作而
嘆曰是可以領略山川之清壯矣予方望紫烟之岫
具黃蔑之舫友二妙于百載寓三嘆于一倡正使持
此而列衡門之素壁亦足對雲錦之九疊而夸瀑布
之千丈也

米元章海嶽詩帖

行書十
七行

仲若呼不聞孝然叫不應東海裛底浪南山入雲徑西
南嵯峨者起伏巧相競火輪激剛風倒化紫金境枕石
不知冷鼓腹歌更遒

右大字海嶽庵雜詩先臣芾真蹟臣米友仁鑒定恭跋
行書
二行

右寶晉米公海嶽雜詩帖真蹟一卷御府之印小米
之跋具焉予始司注左之餉肇整是圖作海嶽堂書
勒石為記謂海嶽在甘露之下繼而城東得故基或

謂予前記為誤予曰皆是也蔡肇天啟銘公之墓曰
過潤愛其江山遂定居焉北固既火作庵城東號海
嶽日哦其間為吾州佳絕之觀是未火之前在甘露
既火之後自西而東矣海嶽之名固也而地則不同
昔在甘露謂江為海謂北固為嶽小矣絜之以東謂
海為海謂四嶽為嶽顧不大哉今視其地信然此雜
詩者固其地歟蔡條鐵圍山叢談曰江南李氏後主
常寶一硯山徑長纔踰尺前聳三十六峯皆大猶手

指左右則隱引兩阜坡陀而中鑿為硯及江南國破
硯山因流轉數士人家為米老元章得後米老之歸
丹陽也將卜宅久弗就而蘇仲恭學士之弟者才時
孫也號稱好事有甘露寺下並江一古基多羣木蓋
唐晉人所居時米欲得宅而蘇覬得硯于是王彥昭
侍郎兄弟與登北固共為之和會蘇米竟相易米後
號海嶽庵者是也硯山藏蘇氏米幾索入九禁矣時
東坡公亦曾作一硯山米老則有二其一曰芙蓉者

顧屈奇後主上亦自為二硯山焉視江南所寶流亞爾吾在政和末待罪時嘗預召入萬歲洞至硯閣得盡見之噫易之誠是也豈居之先後有異而傳聞者至于異辭歟今甘露寺下為絕壁又豈有所謂羣木唐晉人之居公之未東遺址蓋在鰲門鳳池之間所謂並江者尤疎也予家有公所藏大令十二月帖上有東海嶽印海嶽之有東西尤足為的證紹定戊子二月客有在中都聞予新硯山者持以售予因訂其

詳以繫斯贊

贊曰海嶽之東西見于印而驗于碑觀乎此詩景與
物隨於庫噫嘻此皆是也夫豈復有今是而昨非江
湯湯其不移山隆隆其不虧登兮覽兮予言其如之

寶真齋法書贊卷十九

欽定四庫全書

寶真齋法書贊卷二十

宋 岳珂 撰

宋名人真蹟

宋元章硯山詩帖

行書
八行

山硯雲時抱卷書客不傳北窗多異氣正對淨名天

右先臣芾大字二詩五幅

案硯山詩止一首與二詩五幅之語不符當是友仁所跋

本二詩而珂但得其一耳

臣朱友仁鑒定恭跋

行書
二行

右寶書米公硯山詩帖真蹟一卷硯山者公平生所寶也老謀菟裘遂以易海嶽之居予固言之矣治餉京口既得舊址免葵燕麥動懷人之歎因築園建祠以奉公一日觴客鵬雲樓上客鄭君猷視園之扁謂笈中嘗藏公硯山詩取而是之良是贖以得之蓋紹定戊子之四月因刻以殿英光之帖

贊曰壺嶺九華營是一枝何異乎持琬琰以易羊皮硯之不存而寶此詩抑類乎舍魚兔而守筌蹄不我

後先得于斯是几席江山庶幾見之

米元章甘露詩帖

行書二
十行

欲雨氣不透庭梧有栖煙迴首望北固雲藏淨名天呼
童連具與凭高攬山川隱見豈不好開霽景固全須與
剛風流湛湛清露圓歸塗知有伴華月上丹淵 甘露
作呈夷曠

右寶晉米公甘露詩帖真蹟一卷甘露之勝偉矣公
詩奇筆勁亦復稱之予皆未暇論獨詳味呼興及歸

塗作伴之語公之居必在山之趾殆是海嶽未火時
他日既東當不復能竟夕往來矣山有鳳凰池丹淵
蓋指此予于是益信予之記跋皆粗有依據紹定戊
子四月得之蘇臺王氏紙素少暗故湛湛如碧雲色
有藏書家印四字畫尤飄勁于平時實今世奇帖

贊曰公嘗有淨名之詩曰殷勤顧景物為爾老南徐
攷乎此篇則出無晴雨之待觀無陰霽之殊畫呼竹
與基詠歸塗既不舍于斯須其心邇于海嶽之故廬

如曰易硯山之寶儲登樓平章維王及蘇自西徂東
乃獲真居此所謂舍其舊而新是圖予固因以驗予
記與跋之皆不誣也

米元章寶月觀詩帖

行書十
一行

新創亭觀之盛又非海岱比也寶月觀用觀風樓基高
出雲表詩曰濁盡塵難掩光分透露圓香清得桂子珠
瑩陞花鈿求一篇見海月處也

右寶晉米公觀月樓詩帖真蹟一卷海岱在漣漪是

蓋公宰邑時所作者本雜書簡帖中亦摘取而別之
繫以贊云

贊曰月之行空四海清輝宜獨于一觀見之覽層宇
之翬地高而天隨而後可以觀公之詩

米元章鑑遠前詩帖

行書二
十一行

夜登鑑遠觀江南野燒作

君不見紅旗一卷無奔北龍讓將軍初下蜀又不見天
兵十萬領潘曹百丈靈旗照江國高樓夜燈有健賞江

南野燒深山谷烈勢已覺逼南辰龍蛇血膏如爆竹故
應玉石俱被焚老樵拾炭拾斧斤長松巨梓中大廈一
隨烈焰同埃塵人言木自為風憂木中生火自焚然欲
知利害日相應此火害人尤躁熱 芾上呈

右寶晉米公鑑遠前詩帖真蹟一卷帖有四印出貴
臣家嘉定戊辰官鬻于鄧肆德清李氏得之予又贖
之李氏其筆法蓋老作云

贊曰登覽之勝隨寓有感野燒之觀玉石俱慘遲志

一快忘彼物情是以老氏惡夫佳兵觀乎觀乎彼以
為觀而予以為慙

米元章鑑遠後詩帖

行書十
三行

鷗鷺寒依水蒹葭靜靡風朝煙開雨細輕素淡山重

鑑遠樓米老

宋是詩已見前四大字詩帖中題云過常
塗與寶晉英光集所載合今復出于此而

復書云鑑遠樓米老疑是詩本係過當塗所作
而復于鑑遠樓書之珂遂以為鑑遠後詩云

右寶晉米公鑑遠後詩帖真蹟一卷紹定戊子歲二

月得之平江莫氏莫蓋寶晉家戚舊云

贊曰野燒之觀予嘗以為歎此詩之存予又以為欣
一鑑遠耳而戚休之以身天乎非人

米元章即事詩帖

行書十
一行

不應武康清溪之檄端居即事呈淮陽建昌二太守辰
溪監郡三公節上

秘篋大開千古到雪圖小挂滿堂寒墨濃員嶠蜂孤起
枕冷燕山玉一團圓扇古人蜂雀意清風四海弟兄歡
閉關不謝勤來客畏暑非綠懶作官臁脰欲長寧可益

蜩枝求足已能胖有時驚覺神濃夢北里新聲舞翠鷺
右寶晉米公即事詩帖真蹟一卷按書史公游相國
得雪圖為富韓公之壻范大圭持去其記甚詳今此
所挂豈別一王維耶且畏暑不應撤自開秘笈而勤
來之客不拒想皆樞言康公志東輦耳又不知二太
守一監郡果何如人也帖本與諸小帖同得別而出
之

贊曰平時不可告以情之客自不得以窺秘笈而況

乎畏暑與閉關三公得此詩固必能進退如理據空
案以觀者也旁無梅子平又烏知垂涎于滿堂之寒
塞馬得失海疆往還當不足以隔四海兄弟之歡畫
史之浪傳予意其當據此詩以刪之也

米元章催租詩帖

行書
八行

一司日日下賑濟一司旦旦催租稅單狀請出且抄納

弊邑以身當夏稅之責不令受賑時催

百姓眼中聊一視白頭縣令受薄

祿不敢鞭笞怒上帝救民無術告朝廷監廟東歸早相

乞 芾呈

右寶晉米公催租詩帖真蹟一卷詩亦在羣帖中摘
出歲月不可攷意當在公為漣水雍邱時

贊曰賑濟者何人催租者何司有令如斯而無救于
背馳此古人所以設官以採詩也

米元章槐前竹後詩帖

行書
五行

槐前竹後午陰繁壺嶺華胥屢往還雅興欲為十客具
人和端使一身閒

古洲居士曾觀

草書
一行

元章字畫脫盡筆墨畦逕無一點塵俗氣是可寶玩槩

敬書

行書
三行

右寶晉米公槐前竹後詩帖真蹟一卷有楚肖印一

紹定戊子予在京口得之亦娶將張松家物也硯山

槐竹似矣餉事日殷安得身閒如公之賦詩乎予于

是有感焉

贊曰槐竹之與居相相乎華胥予方發韓滉之連臚

午陰之繁維以驅原隰之車蓋健美乎一身之間所以縱玩乎八體之書

米元章萬籟詩帖

行書
八行

萬籟寒深響羣山隱映開遲遲暮鐘裏且喚竹輿來

右寶晉米公萬籟詩帖真蹟一卷按此亦甘露作也
寒夜鳴鐘猶不廢登覽江上風月公胸中固有之矣
帖與甘露詩同得亦有藏書家印四

贊曰甘露之江山世固指為天下之第一矣而况公

胸中自有烟霞之痼疾耶予嘗持斯帖據狼日望淮
海弔今昔慨然歎曰神州沈陸固當待一代之英雄
名勝風流亦必屬百年之翰墨也

米元章壯觀前詩帖

行書二十五
行內詩連書

無涯小智日營營昔昔浮生夢數驚重到白沙登壯觀
江湖醉眼雙揩明

夢寐中間得虎時孔軻如在定能知江山勝處頻傾酒
我是當年謝客兒

右寶晉米公壯觀前詩帖真蹟一卷有內殿圖書五
紹定小璽一其子友仁鑒定于後按山林集嘗有是
賦泱泱乎瑰辭雄談前無鄉雲殆與是詩相為表裏
信哉山川清奇樽俎名勝要川壘岷塵埃者所可與
議也嘉定甲戌十一月予在中都得之鄧鬻者

贊曰北山之麓有奇觀景絕人奇乃無間賦非雕蟲
句有眼千古雄姿想蕭散我觀此卷字老嫺猶似古
吳親數頻借公舊詩聊永歎跪閱墨皇三復返

米元章壯觀後帖

行書十一行

同二公遊壯觀上呈府公工部節

壯觀不到俄四暮丁寧老思棋雄奇羣山勢活各奔走
大川氣斂合衆離蒼嵌留雪玉刻巧碧落靜滑紅輪馳
寒朔不生九澤凍行膠與子約再來

右寶晉米公壯觀後詩帖真蹟一卷亦在舊帖中公
于壯觀拳拳如此胸次可知也

贊曰四暮之不到雪與日果停舟不棹無嫌平衡冒

出此詩畫摹寫天巧觀之壯思之老詩乎可攷

米元章姑孰詩帖

行書二
十二行

下與照潤數星星一世還如隔世經不見山東李十二
青山山色只青青

過姑孰作海嶽米老

右姑孰詩大字先臣芾真蹟臣米友仁鑒定恭跋

右寶晉米公姑孰詩帖真蹟一卷短軸大字筆老意
真有其子友仁跋凡璽印十有七厯厯咸具詩蓋為

宮錦謫仙而作千載相望可以紹遺獨矣寶慶乙酉
四月予得之京師鄧鬳者開卷歎息因賡其詩以為
之贊

贊曰天上文章一酒星生平只欠換鵝經奇才逸思
通千古留待南宮眼為青

朱元章道林詩帖

行書十
四行

陟嶽不自期孤雲掛松頂一揖不相期飛去無留影雲
已去泉更長雲泉畢世友相得每相思

連漪瑞墨堂書

先子道林小詩一首友仁鑒定真蹟謹跋

行書
二行

米元章字畫類能用其所長徃徃不擇敵筆皆得如意
至于險怪脫略雖其病處亦自成研者也慶元戊午秋

八月周蒙題

行書
四行

右寶晉米公道林詩帖真蹟一卷有其子友仁鑒定
他蹟皆著臣名惟此則否蓋士夫家所藏于取正于
友仁者也予開禧丙寅以南徐庾吏被檄犒師宿泗

至于連漪荒壘頽垣中有十數立石皆靈壁奇甚孤
榛免葵蕪穢埋沒或指謂予曰此瑞墨堂故基後二
十三年而得此帖于京口道林在三湘間豈連漪別
有其名耶極目莽蒼又豈雲泉松陰隨時變遷耶不
然則友仁之鑒定或在他帖而此詩非道林之真耶
按山林集詩無名特繁之瑞墨堂是拾遺者亦不得
而攷耶贊之以傳疑焉

贊曰道林之名予不得而知雲泉松石之勝寫于連

將必其地之景物足以稱其詩也今其陳跡杳然已
無復遺予蓋嘗登瑞墨之基渺一境之陂陀皆平蕪
與荒畦又惡覩所謂畢世相忘之奇泉侈雲歸松橋
斧隨世固多有之而予獨于此奇其北向之悲也

米元章賞心詩帖

行書十行尾記二行共二十字
案二十字原注云十行恐有誤

尾記二行亦脫
去今並仍原本

晴新山色黛風縱蘆花雪盡日倚雕欄寒宵低細月

右寶晉米公賞心詩帖真蹟一卷嘉定己卯予漕江

東屢登賞心訪卧雪之圖問坡仙之跡獨未知有是
也後八年二月于京口得之以三萬錢予欣然蓋自
慶未始得聞也意如寶晉者豈知百餘年後為人作
三萬錢地耶

贊曰金陵之賞心天下之奇觀真足以當南宮之詩
關

右銀青光祿大夫守尚書右僕射兼中書侍郎上柱國

魯郡開國公曾布撰奉議郎充江淮荆浙等路制置發
運司管勾文字武騎尉賜緋魚袋米芾書龍圖閣學士
朝請大夫知揚州軍州事兼管內觀農使上護軍曲阜
縣開國子賜紫金魚袋曾肇篆蓋

治平中余為海州懷仁令而永康陳君實佐余為主簿
余與君皆少且壯相得甚適後六年余以翰林學士判
司農寺薦君為勾當公事余諭事貶番禺君亦以憂去
又二十年余在政府而君復官守京師又七年君以疾

卒明年其子次中縗服自浙東來再拜且哭願得銘也
余與君游四十年而又以仲孫之孫妻次中銘詎可辭
君諱愷字濟公婺州之永康人曾祖思遠祖文授父億
知名朝奉君與大父相繼卒君力學有大志少以文采
知名朝奉君與大父相繼卒君未及冠家故貧無貲喪
祭冠婚悉倚君以辦其餘力已能嫁兄弟之女未嫁者
登治平四年進士第初仕蓋懷仁也徙光州軍事推官
知廬州合淝縣丞事熙寧中神考肇新百度弛徭役以

寬民力修水土以敦本業更常平歛散之法以恤貧弱
九經畫民事一委之司農故司農最號要地為從事者
實一時高選然經始之際四方以利害言無虛日君從
容研究纖悉通解時以為稱職遷著作佐郎且命按察
淮西農田保甲等事召對便殿復使淮浙兩路歲大旱
民轉徙于道君移文郡縣賑恤之嫠為甚飢殍枕藉君
欲發常平之粟以紓其急部使者喋不肯從君顧而言
曰吾銜命使一方民疾苦若是儻不能盡力于斯實辱

君命且君職在廉察爾終能與我違戾耶責固在我爾
安無恐乃大開倉廩民賴以活部使者由是銜之君之
出使里人有擊鮮醢酒以勞之者而使者在所部乃
以君為墨而置之獄有司傳至卒坐法免議者以君為
寬哲宗踐阼以恩復宣德郎監福州海口鎮鹽稅徙光
祿寺丞分司南京已而朝廷知其非辜悉除其罪以遷
為鄖國忠正武昌軍三院大小學教授秩滿除通判熙
州未行改管勾步軍司差撥判員所今天子嗣位賜五

品服累遷至朝散郎飛騎尉元符三年七月屬疾謂其子曰吾且死亟告老以歸乃屏醫藥不復詢家事旬日而卒寶癸巳日也享年六十有六以崇寧元年三月十七日壬申葬于龍山之北原娶錢氏封金華縣君子男五人長曰次牧太廟齋郎次曰次公次曰次中擢進士第為峽州安遠縣尉次曰次仲次道與次公舉進士女三人長適鄉貢進士袁輪次適鄉貢進士李光祖次適鄉貢進士許操孫男二人女一人君詞學爽邁少以氣

自蒙而又敏于從政所至輒治辦熙寧首被選擢人實
期以通顯然一遭橫逆誣服受詬坐廢幾二十年困蹟
有如是者余自州縣吏與君相好逮余執政君已垂老
而不用于世方將從容薦于上而君不幸死矣豈命也
夫銘曰仕困于仇而不克顯才屈于命而不克施有子
而立嗣厥世君則不朽刊吾詩

右陳朝散墓誌丞相魯公撰先子晚年真蹟紹興丙寅
仲夏二十八日獲觀友仁鑒定謹書

行書
四行

右寶晉米公書曾文肅陳濟翁墓誌帖真蹟一卷談
墓之文豐碑碩碣相望于牆間而世率不之錄者書
也紹定戊子二月得之雪川李氏

贊曰予觀柳少師在唐以能書聞當時碑誌或非其
筆則人以不孝議其子孫噫噫陳君之傳夫豈以文
如寶晉者亦庶幾乎其人矣

米元章書山谷大悲懺贊帖

行書六行
尾批四行

通身是眼不見自己欲見自己頻撒驢耳通身是手不

解著鞭墨牛懶情空打車轅通身是佛頂戴彌陀頭上
安頭笑殺涪皤

魯直題徐文信大悲懺贊見其人誦其語真脫塵埃耳
芾元章

石竇晉米公書黃山谷大悲懺贊帖真蹟一卷公與
山谷同時而景慕之如此異時求薦之帖曰襄陽米
某文在蘇軾黃庭堅之間其竊比之心亦可見已如
是懺者以勝妙相接引衆生居閻浮提幻非幻質贊

語透徹三昧流出見性成佛直指人心所謂畫者贊者皆得成就第一希有功德于此時乃能取三生八體結習為一大緣事作摩訶薩埵觀引筆行墨正念現前等是二者無有差別又所謂不于一佛二佛而種善根乃至百千萬億佛種諸善根者見聞勸喜得未曾有此歲在丁丑室伐掣月從越口氏我乃受持復宣此因說偈讚歎又所謂受者藏者讚說者皆植福本于口世與佛有緣神通光明具足圓滿于口寶

真是足以為寶矣

贊曰我佛住世大開方便有大士者現自在身以千
手眼一一接引指示羣迷照破諸妄如是我聞佛說
了義諸鈴杵鐸寶塔經卷輪拂瓔珞種種所執凡所
執者俱非有相智慧清淨肉眼慧眼佛法天眼種種
所見凡所見者俱非有著以無相故釋諸纏縛一切
衆生得大解脫以無著故具足圓明一切衆生得大
知見佛尚無相何況于讚佛身常住即心是佛稻麻

竹葦無限劑數彼頂戴者皆真實相百千萬億何況
于身涪幡說法如標月指標本在手何者為月寶晉
寫讚如轉輪王運轉隨人終不成道我不見慳我不
執竿非見非手眼皆具稽首大士大慈悲故去我妄
想即見如來

米元章臨晉武帝大水帖

草書四行
尾記一行

去歲大水城中大飢撫別君便常分南諸軍耳此奈卒
無所復箭已送

右晉武帝書李太師瑋本

右晉武帝大水帖先臣芾手臨真蹟臣米友仁鑒定恭

跋
行二

右寶晉米公手摹晉武帝大水帖真蹟一卷寶晉平生自言法書斷自西晉其作書史載李瑋家所得晉賢十四帖中有臣詹晉武帝批答一豈此耶臣詹不知何人不足摹故止及武帝書耳按今中祕羣玉堂帖芾真蹟有云好事家所收帖有若篆籀者回視二

王頌有塵意晉武帝帖是也謝奕之流混然天成謝
安清邁真宜批子敬尾也其帖首尾印多與弊笥所
收同君倩唐氏陳氏之類印玉軸古錦皆故物希世
之珍不可盡言恨不能同賞歸即追寫數十幅頓失
故步可笑可笑觀此芾之留意蓋可見西晉字在今
豈可復得得見芾之摹斯可矣其子友仁嘗著鑒定
縫有內祕書印紹興印二宸奎標目嘉定甲申十月
客或得之宗藩以歸于我

贊曰論帖至晉書法之祖遡晉而西又舉一武模散
質寓意研態魯禁衛之藏尚觀真古

米元章臨謝安八月帖

行書
七行

米芾臨謝安八月五日帖

仰書
題跋

八月五日告淵即廓攸靖玄允等何圖酷禍暴疾中郎

奄至逝沒哀痛崩慟五情破裂不自堪忍痛當奈何當

復奈何汝等哀暴斷絕號咷深至豈可為心奈何奈何

安疏

右謝安八月五日帖先臣芾手臨紹興九年四月二十

七日臣米友仁審定恭跋

三行

右寶晉米公手臨晉太傅謝安字安石八月帖真蹟一卷按帖本在淳化閣帖中東淮餉府供軍堂所刻破毫帖之次亦有此臨帖本出天上有紹興三壘并宸翰標目亦其子審定而帖中情字作內字又中間少十二字末少奈何二字蓋臨帖縱筆隨意所謂者不若此本則與閣帖皆同也友仁謂芾平生蓄晉帖

日臨學不計數夜則以小笈置枕旁攷之寶晉山林集所贊所藏芾嘗自指此為絕品宜其臨本之多也帖尾友仁跋字與前跋亦載歲月又不知中興後所流傳者有幾而吳氏之傳與予之得脗合如一是一又重可貴也寶慶乙酉二月得之故宗臣家

贊曰八月一帖無為寶晉之刻則其初也兵燬而後重取而鐫遺其精而得其粗也京口供軍之碑紹興所傳芾之書也此帖亦其同時同出于尚方之儲也

帝之嗜帖所謂麻紙十萬足以驗其平生之工夫也
字與跋皆不同蓋所臨雖出一手而其所得之時日
則殊也供軍帖字之所以寡出于率意之真而此二
帖則皆臨而非摹也京口海嶽帝所居也兩臨本之
並傳尚可以見其人之緒餘也

米元章臨智永千文真草帖

十二行天地玄黃至
榮重芥薑海真草間

列尾記二
行文不錄

崇寧兩學書贈亦虛

右智永書真草千字文真蹟先臣芾手臨臣米友仁鑒

定恭跋

行二

右寶晉米公手臨陳僧智永千字文二卷摹臨兩法本
不同摹帖如梓人作室梁櫨榱桷雖具準繩而締創
既成氣象自有工拙臨帖如雙鵲並翔于九霄青天
浮雲浩蕩萬里各隨所至而息寶晉蓋進乎此者也
神動天隨筆與心會似不似未可期而真態頡頏已
與千載相上下矣帖有小璽藏肝江廖氏慶元丁巳

予歸自閩九月相遇皇華館廖方以此軸投郡守丘
琛予輟而取之

贊曰永之法研以婉芾之體峭以健馬斗其風神合
志通彼妍我峭惟神克肖故曰袒褐不浼夜戶不啟
善學柳下惠莫如魯男子芾其知此

米元章臨右軍四帖

草書第一帖七行第二帖三
行第三帖二行第四帖六行

米芾臨王羲之初月十二日等帖

御書
題籤

初月十二日羲之累書至也得去月二十六日書為慰

以可不下達之不無所一欲嗽不化消諸弊日甚不知何以教之罔然及不王羲之頓首

官舍佳也節風故不適可憂彼云何昨得熙書殊佳甚慰甚慰

得官奴晉陵書平安念懸懸此粗佳一日書以口口口見尚書一日遣信以具必宜有行都情事恐不可委行使耶遲遠具問近以之尚書懷今後遣吳興也

羲之真蹟四帖麻紙上書先臣節舊所藏其二得于職

方員外郎劉涇其二得于大相國寺僧清道偶合縫有
唐室貞觀小璽文大觀間已獻御府迄元祐之末先臣
希權潤州州學教授時紹聖間任樞密院事林希以待
制為潤守極好古博雅出此帖示之希曰昨祕閣所見
貞觀印文貞字在上觀字在下相去五六寸許遂熟視
之所印上下各不相對希嘆曰益顯此書是真唐御府
所藏蓋或有時上下印也先臣希所藏晉唐真蹟無日
不展于几上手不釋筆臨學之夜必收于小篋置枕邊

乃眠好之之篤至于如此實一世好學所共知此帖乃
先臣帝中年手臨今得秘于紹興嗣聖天府實萬世不
朽之傳翰墨之學出類拔萃必有神物護持亦可謂榮
遇矣今臣忽得經目一閱恭跋于後臣又繼膺宸翰所
臨以賜伏覩筆意快逸意在筆先字字縱心皆相連屬
龍驚飛翔眈映觀觀深得羲之法度妙處非愚臣所敢
率易窺頌得以寶之什襲傳示雲來臣之一門父子預
榮實千載未易逢之幸也紹興七年閏十月十二日臣

米友仁書

行書二
十六行

右寶晉米公手摹王右軍四帖真蹟一卷其子友仁奉詔跋其後具記顛末帖有米帖翰墨印鶯熊後入印壬寅印各二首印半已不存內府書印幾暇清玩之印內祕書印各一又有宸翰標目嘉定甲申歲十月有貴裔自都攜過金陵以售予惟京口餉臺有供軍堂前使者吳琚嘗以內府所賜寶晉破卷帖刻之石珂復于是堂得此帖皆出一手皆得之天上意若

神物之合自有其時而非偶然者乃復刻置堂廡俾
對峙焉

贊曰東淮餉府供軍堂壁有龕石鸞鵲翔問之何石
摹破菟曾傍雲漢分天章廷陵刻此侈寵光後四十
載猶煒煌我持搨本謹茲藏三年倚徙玩未央客來
袖出雲一張曾染復古隃麝香珠璣別出十九行鸞
喜比並走且僵攜華絢彩交相望宛然並粲如英皇
幾年絕識高君王尚取鑒定煩諸郎半歸左晚半尚

方駕言駟隰留遺芳今夕何夕獲干將鏤鄒未睹龍
已驤吳侯攀髯歸帝鄉秋虹挾月常貫牕誰能簡雲
開斗房攜書伴我老柴桑要隨神物恢混茫更斲此
石封苔蒼六丁雷電未可量會見難起初平羊

米元章臨右軍玉潤帖

行書十一行內
先生字空闕

官奴小女玉潤病來十餘日了不令民知昨來忽發痼
至今轉篤又若頭癰頭癰以潰尚不足憂痼病少有差
者憂之焦心良不可言頃者艱疾未之有良田民為家

長不能克已懃脩訓化上下多犯科誡以至于此民惟
歸誠待罪而已此非復常言常辭想官奴辭以具不復
多白上負道德下愧先生夫復何言

羲之玉潤帖世舊有石刻流傳好事之家多有雙鉤模
本此帖先臣芾手臨蓋中年字也筆筆取似故無少異

紹興丙辰季冬初七日臣友仁審定

行書
五行

右寶晉米公手臨王右軍玉潤帖真蹟一卷嘗入九
禁有內府三印其子友仁鑒定于後筆勢所及真有

衛夫人所謂洞精適媚態度使右軍而在猶當起咄咄逼人之嘆也按書史帖乃唐人岑金紙上雙鉤摹連在稚恭帖後字大小一如蘭亭帝自以想其真蹟神妙為言則是未嘗得見真帖摹之又摹猶能如此意所到處殆所謂閉戶造車出門合轍者矣珂嘉泰甲子歲十二月之官南徐李奉寧燕餞以是為贈贊曰熠煜客星顒達之伍乎軒冕相禪泉石之娛乎美疾惡石天所痼乎情之所種同此趣乎排九閭之

雲巫咸之訴乎後千年有人堙澤之呼乎

宋元章臨筆精日寒二帖

行書十
三行

紙筆精要深知兒至欲一物而無所書信後酬德筆永
不可用都下三錢方上之選信致一者佳并自三兄道
此也衛軍名書

日寒涼得告承諸惡猶不勝復極嘗慘痛悲灼僕病正
自不差疾久自憂日深悲企甚積既慘居疾係以罪黜
二三不越出門近起取叙不復益企恨壯掌有人當復

見耳及不次獻之白

右寶晉米公手臨王右軍筆精帖大今日寒帖真蹟
一卷淳熙閣帖以為羊欣書按書史王羲之筆精帖
內兩字集在諸家碑上縫有貞觀半印王獻之日寒
帖有唐氏雜迹印後有兩行謝安批所謂批後為答
也唐太宗不收獻之帖而收雜帖故于帖上刮去不
白獻之白字謂之羊欣以應募而以前帖為薄紹之
書跋尾書官姓名云大厯某年月日下刮去古姓名

五代人題曰薛邕記之後題一行曰某年和傳遺予
押字是薛丞相居正此卽和凝丞相疑為薛氏故物
以遺薛也其後歸王文正家此乃芾見真晉帖之始
今此臨本後仍有不次等五字蓋芾想像刮去之遺
蹟而足之者而寶章待訪錄又載二帖顛末曰本故
相王曾家物在其孫景融處後為倒龍圖待制沈括
得中取之古跋右軍作羊欣日寒作壽紹之仍將大
中歲跋刮去數字填為薛邕記之而故相薛居正題

曰和傳遺予此蓋和凝以為薛氏故物歸居正耳唐
太宗雅不喜子敬書故時人以他名名之以應募所
謂紹之書白乃于耳字下刮去及不次獻之頓首字
猶在一分許可識大中所跋既不能辨復為不鑒之
人所收遂使至寶永失其真吁可痛也所紀互是特
芾所臨復帶筆莫知其為白或頓首也以一人之筆
力合千載之二妙此臨書之所無非芾其孰能與于
此哉即臨以相真當益可珍尚惜其不得見真矣帖

故在李奉寧家有紹興御筆題字仍著小璽嘉定戊辰歲二月予就試中都因即其家閱書帖見之指所題誤合二者為一摘其不然為撫米書及閣帖參定客雖不信既而皆昭合李喜舉以遺予

贊曰羲獻之蹟臨者米也邇觀欣書乃二體也隨珠卞璧萃此紙也以鑒得之亦可紀也

米元章臨王獻之臺符帖

單者
三行

米芾臨王獻之臺符帖

奇

御書
題籤

元參軍雖可外將豈知何白臺符從事耳

右王獻之臺符帖十六字先臣帝書紹興十年二月十

五日臣米友仁審定恭跋

行三

右寶晉米公手摹王獻之臺符帖真蹟一卷紹興天
筆書標目注以奇字有其子友仁審定昭同下賁萬
物五色帝于是有餘榮矣帖故先君手裝有帝二印
內府五印藏書家一印標軸蓋天上物云

贊曰帝贊謝安帖而嘉其得太帝之翰墨龍跡震驚

言猶未泐豈知其身被帝澤也哉士患不能不患不知百世俟聖乃今見之于將以之為行己之師

宋元章臨王獻之東問帖

草書
三行

宋芾臨王獻之東問帖

御書
題跋

東問具道姊消息此人豈能知其況耶

右王獻之東問帖十五字先臣芾書紹興十年二月十

五日臣朱友仁審定恭跋

行三

右寶晉米公手摹王獻之東問帖真蹟一卷首尾列

內府四印藏書家一印帶二印紹興天筆題其首其
子友仁跋其後帶摹帖多矣簡嚴精絕惟此帖與臺
符帖為然亦予藏予家故藏

贊曰字有十五如月當戶騰輝以望靡忒今古匪獻
莫具匪芾莫祖誰其修之其玉其斧

米元章臨顏真卿放生池帖

楷書
六行

天下放生池碑金紫光祿大夫湖州刺史上柱國真卿
撰并書

右先臣芾手臨顏真卿書放生池二十四字臣米友仁


鑒定真蹟恭跋

行三

右寶晉米公手摹唐顏魯公放生池帖真蹟一卷顏
米本異體摹而傳之見其習之博而嗜之專也雖然
骨格之存似不蓋真予固有稽焉帖藏御府故出杜
氏存者三印表以小璽其子友仁復著鑒定嘉定壬
午二月得之江陰王氏

贊曰楷正而端方維顏之長軒昂而自喜維米之體

多嗜而博愛故能有其態畧迹而取神故不沒其真
是曰唐放生之碑作者書之能者摹之江陰之王昇
我儲之五御既調又日驅之於序後生誰能如之



寶真齋法書贊卷二十